



2EME SESSION ORDINAIRE POUR 2016

REUNION DES 24 ET 25 NOVEMBRE

N° 2016/O2/068

**DUMANDA À BOCCA POSTA DA Mme Nadine NIVAGGIONI
PÈ U GRUPPU « FEMU A CORSICA »**

OGGETTU : U batteriu *Xyllela fastidiosa* : À situazione impeghjuria, misure rinfurzate !

Madama a Presidente di l'Uffiziu di l'Ambiente, Sgiò Presidente di l'Esecutivu di Corsica,

A situazione tantu temuta, hè accaduta : un casu di u ceppu Pauca nant'à un Polygala hè statu identificatu in Menton, mentre ch'ell'era classificatu, à e prime analisi, Multiplex.

A cumbinazione da Multiplex ver di un antru ceppu hè oramai da piglià in contu ; moltu più, chì tutti i casi di xyllela scupertu in Corsica sò Multiplex.

Da u 26 d'aostu di u 2014, avemu dumandatu à u Statu di piglià misure adatte à u risicu maiò di catastroffa sanitaria, ecologica è economica. Vi rammentu chì a xyllela dissuchja l'alivi, ma dinù, a vigna, e lecce, i quarci, l'amanduli, l'agrumi, u furaghju, e piante urtulane é di urnamentu. Mette in periculu l'equilibriu sanu sanu di i nostri ecosistemi isulani.

Cù a calata di a mubilisazione popolare, e misure di u Statu sò state allenate :

- E dirugazione à l'arrestatu di u 2015 nantu à l'impurtazione di e piante é di l'arbori sò cresciute in veru : 171 dirugazione per vegetali specificati in lu 2015 è 687

in lu 2016 ; per i pianti d'alivi: 1403 in lu 2015 é 5921 in lu 2016. Mentre chì l'oleicultori corsi hanu organizatu a so propria pruduzione d'alivi.

- I cuntroli à i porti é à l'aeroporti sò di più in più scarsi é custosi secondu u Statu.

- A cumunicazione, ne si sente, ne si leghje.
- E riunione misinche in Prefettura, sò piantate.

E proposte fatte da u Statu à l'ultimu CROPSAV c'impenseriscenu assai è un rispondenu micca à u risicu altu di cuntagione :

- Prevede di mette in Pumonte è Cismonte, duie strategie sferente d'intervenzione é à mezu, un curdone sanitariu,
- Intende cuntabilizà i casi d'infezzione è impedì di piantà ne zone cuntaminate.

In pettu à 'ssa ligerezza, u gruppu Femu A Corsica, chì per contu soiu, rilancia a mubilisazione, vi dumanda :

- D'inverne perchè u Statu pianti e dirugazione,
- Ch'ellu ripigli i cuntroli ni porti é aeroporti,
- Ch'ellu metti in opera di manera seria una cellula di crisi,
- Ch'ellu sparghjì una cumunicazione larga nantu à a quistione sanitaria, in direzione di i passageri, è in i lochi publichi di l'isula,
- Ch'ellu travagli incù e regione di u meziornu di a Francia nant'à strategie cumune o complementarie di prevenimentu,
- Ch'ellu lanci a ricerca nantu à l'eculugia di l'insetti vettori di trasmissione.

Madama a Presidente di l'Uffiziu di l'Ambiente, Sgiò Presidente di l'Esecutivu, ne simu à i punti stremi é una mancanza di decisione forte pò purtà a Corsica à a ruvina.

Saremu à fiancu à voi per cunvince u Statu nant'à l'urgenza di e misure rinfurzate à piglià.

À ringrazia vi.